

Kommune Kujallermi qimmeqarsinnaanermut qitsuuteqarsinnaanermullu.

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18 30. oktober 1998-meersumi § 13, imm. 1 aamma § 28, imm. 2 aamma 4, kingusinnerusukkullu Inatsisartut Inatsisaatigut nr. 23 22. november 2011 allanngortinneqartut naapertorlugit aalajangerneqarpoq:

Qimmeqarsinnaanermut qitsuuteqarsinnaanermullu akuersissut

§1. Kommune Kujallermi qimmeqarsinnaanermut qitsuuteqarsinnaanermullu piumasaqaataavoq kommunalbestyrelsimit allakkatigut akuersissuteqarnissaq.

Imm.2. Qinnuteqaat Kommune Kujallermi najukkani Teknikikkut ingerlatsivimmut nassiunneqassaaq. Qinnuteqaammi uppersarsarneqassaaq ileqqoreqqusami matumani aalajangersakkat eqquuttinneqarsimanissaat.

Imm. 3. Qimmeqarsinnaanermut qitsuuteqarsinnaanermullu akuersissut inuup nammineq pigivaa taamaattumillu inunnut allanut tunniunneqarsinnaannani.

§ 2. Kommunalbestyrelsip inuit qimmeqarsinnaanermut qitsuuteqarsinnaanermullu akuersissummik qinnuteqarneranik itigartissinnaavai, sakkortuummik arlaleriarlutilluunniit maleruaqqusaq una unioqqutissimappassuk.

Imm. 2. Kommunalbestyrelsip qimmeqarsinnaaneq itigartitsissutigisinnaavaa innersuussutigalugu qimmeq pineqartoq/qimmip suussusia pissutigalugu, qimmiutigineqartut katillutik qanoq amerlatigissusiat eqqarsaatigalugu, qimmip sumi najugaqarnera aammalu kommuunip innuttai ataatsimut eqqarsaatigalugit.

Eqquassinissamut akuersissummik noqqaassummik tunniussaqaarneq

§ 3. Inuit ataasiakkaat Kalaallit Nunaannut qimminik qitsunnillu eqquassinissamik akuersissummik qinnuteqaataat tunniunneqassaaq *Kalaallit Nunaata Sinniisoqarfianut, Strandgade 91, Postbox 2151, 1016 København K*, aallarussinissaq sioqqutingaatsiarlugu aamma uppersarsaatini pisariaqartunik ilaqartinneqassaaq.

Imm. 2. Uumasumik eqquassinissamut Sinniisoqarfiup akiuersissutaa, kiisalu allagartat uppersarsaatillu uumasumut malitsigitinneqassapput.

Qimmiuteqarfiullutillu qitsuuteqarfiusinnaasut

§ 4. Angallatini Kommune Kujallermi angerlarsimaffilinni qimmiuteqarneq qitsuuteqarnerluunniit inerteqqutaavoq.

Imm. 2. Angallatit Kommune Kujalliup avataaneersut qimmiuteqarunik qitsuuteqarunilluunniit

angallammiit niutinnissaat inerteqqutaavoq, Kommunalbestyrelsi allatut ittumik akuersissuteqarsimanngippat.

§ 5. Kommune Kujallermi savaateqarfinni savat qimmii, tassa Border Collie, Kelpie imaluunniit taakkunannga akusat kisimik qimmiutigineqarsinnaapput.

Kinguaasiorsinnaajunnaarsitaaneq

§ 6. Qimmit arnavissat qitsuillu arnavissat tamarmik, Kommune Kujallermut eqqussat imaluunniit pissarsiarisat, pilatsinnikkut imaluunniit kapitinnikkut naartusinnaajunnaarsinnikuussapput. Tamannali atuutinneqanngilaq savaateqarfinni savat qimmiinut.

Imm. 2. Qitsuit ilumittut eqquteqqusaanngillat.

Imm. 3. Qitsuit angutivissat issuerlugit kinguaasisorsinnaajunnaarsinneqarsimassapput.

Imm. 4. Pilatsilluni naartusinnaajunnaarsitsinermut atatillugu aningaasartuutit kommuunip susassa qarfiginngilai.

Imm. 5. Qimminik imaluunniit qitsunnik kinguaassioertitsineq inerteqqutaavoq. Savaateqarfinnili savat qimmiinik, tassa Border Collie, Kelpie imaluunniit taakkunannga akusanik kinguaassioertitsisoqarsinnaavoq.

Illersuummik kapitissimanissaq qungatsimilu allagartat

§ 7. Qimmit qitsuillu malittarisassat ataavartut malillugit nappaatinut illersuummik kapitinnikkuusimassapput.

Imm. 2. Qimmit qitsuillu qungaseqummik atugaqassapput nalunaaqqutalimmik perlerornermut akiuussutissamik kapitissimanermik uppersaataatitallimmik aammalu allagartamik normutalimmik Teknikimut Ingerlatsivimmit tunniunneqarsimasumik.

Imm. 3. Qungasequtit qimmimut ajoqusiinnaasut atornissaat inerteqqutaavoq, tassalu qungasequtit naqqusartallit iml. qungasequtit sukallugit qimitsisinnaasut.

Qimmit pitussimanissaat

§ 8. Qimmip pitoqqatiinnarneqarnissaa inerteqqutaavoq.

Imm. 2. Qimmeq pitoqqassappat pituutaa naannerpaammik meterinik tallimanik takissuseqassaaq.

Imm. 3. Qimmit aneersinneqartut ungaluniitinneqassapput kalunnernilluunniit pitussimatinneqassapput.

Imm. 4. Qimmit taamaallaat pitussimatinneqarsinnaanngillat piginnittumit naalakkersorneqarsinnaagunik illoqarflluunniit killeqarfiata avataaniikkunik.

Qimminik nakkutilliisoq

§ 9. Kommune Kujallermi kommunalbestyrelsip toqqassavaa illoqarfinni Nanortalimmi, Qaqortumi Narsamilu qimminik nakkutilliisoq suliassanik makkuninnga akisussaasuusoq:

1) Qimmit imaluunniit qitsuit nalunaarsorneqarnerat.

2) Qimminik imaluunniit qitsunnik piginnittut nalunaarsornerat.

3) Qimmit angalaaginnartut qaamatilik arfinillinnik utoqqaanerulersimasut, qitsuit angalaaginnartut, qimmit qitsuillu inerteqqutaasumik eqqunneqarnikut kiisalu taakkua pineqartut pigineqanngitsut tiguneqarnissaat toqunneqarnissaallu.

Qimmit qitsuillu angalaaginnartut, pigineqanngitsut kiisalu qimmit qitsuillu inerteqqutaasumik eqqunneqarlutillu uumasuutigineqartut

§ 10. Qimmit angalaaginnartut, pigineqanngitsut, uumasuutigineqarnerinik uppersineqarsinnaangitsut aammalu unioqqutitsilluni eqqullugillu uumasuutigineqartut toqqunneqartassapput.

Imm. 2. Qimmeq qitsulluunniit, kimit pigineqarnerisq imaaliillaannaq uppersineqarsinnaasoq, soorlu atsiukkamik qungasequtsigaq, nal. akunnerisa 24-t iluani toqqunneqarsinnaavoq, inuttaa ilisimatinneqareersimappat qimmip qitsulluunniit tigusarineqarsimanerani, inuttaa ersarissumik ilisimatinneqareersimappat, qimmeq qitsulluunniit toqqunneqartussaasoq aaneqanngikkuni.

Imm. 3. imm. 1 aamma 2 malillugu toqutsineq pissaaq piginnittumut taarsiissutaassussaassutitaqanngitsumik.

Naammigittaalliorsinnaaneq

§ 11. Arlaatigut qimmiuteqarnermut imaluunniit qitsuuteqarnermut tunngasunik ippigisaqarsimagaanni naammagittaalliut kommunalbestyrelsimut ingerlatinneqassaaq.

Kinguneqartitsineq

§ 12. Qimmit qimuttut kiisalu qimmeqarneq qitsuuteqarnerlu pilugit inatsisartut inatsisaanni § 28, imm. 2. malillugu akiliisitsisoqarsinnaavoq ileqqoreqqusami matumani § 1, imm. 1 aamma 3, § 4, § 5, imm. 1-3 aamma imm. 5, § 6, § 7 aammalu § 8-mi aaliangersakkanut tunngasunik unioqqutitsisoqarsimassapput.

Imm. 2. Piginneqatigiiffiit, anpartsselskabet assigisaalluunniit unioqqutitsisimappata, ingerlatseqatigiiffik akiliisinneqarsinnaavoq.

Atuutilersinneqarnera

§ 13. Ileqqoreqqusaq atuutinneqalerpoq ulloq 15.11.2013.

Imm. 2. Tamatumunnga atatillugu atorunnaarsinneqarput kommunit ileqqoreqqusaq ukua atorunnaarsinneqarput:

- 1) Qaortup kommuniani Qimmeqarsinnaanermut qitsuuteqarsinnaanermullu ileqqoreqqusaq 30/9-2002-meersoq
- 2) Nanortalip kommuniani Qimmeqarsinnaanermut qitsuuteqarsinnaanermullu ileqqoreqqusaq 4/7-2006-meersoq
- 3) Narsap kommuniani Qimmeqarsinnaanermut qitsuuteqarsinnaanermullu ileqqoreqqusaq 13/3-2008-meersoq

Taamaasilluni akuerineqarpoq Kommune Kujallermi kommunalbestyrelsimut, ulloq ____2013

Jørgen Wæver Johansen
Borgmester

Matumuunna Kommune Kujallermi qimmeqarsinnaanermut qitsuuteqarsinnaanermullu ileqqorerqusaq naqissuserneqarpoq.

Kalaallit Nunaanni Namminersorlutik Oqartussat, ulloq 14. november 2013

Karl Lyberth

Aalisarnermut, Piniarnermut Nunalerinermullu Naalakkersuisoq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut